

sanjvwenz

Aen Mbanjranz Ndaw Sing Swenj Duzbid

蝉鸣里的故乡

□Fangh Feih

Gou geiq ndaej, seizhah caen-cingq daeuj daengz, dwg daj duzbid swenj sing daih it hainduj. Youq raeblaeng ranzgaeuq gou, miz diuz haenzdah raezrangrang he. Laj haenzdah ndaem miz haujlai faex, youq ndaw benq ndoeng neix, couh dwg aenranz duzbid, hix dwg giz duzbid hemqswenj ceiq nauhyied ndeu.

Youq ngoenz ndeu ndawde, duzbid hemqswenj caemh mbouj doxdoengz. Gyanghaet hemqswenj godan youh raezrang. Daengz banngaiz, ndit haenq lumj feiz, mbwn ndatfwdfwd, duzbid hemqswenj gaenj-gip, sing gok caemhcaiq miz di coegrwz. Daengz haeujhaemh, duzbid hemqswenj naiqnuek, lumj bouxvunz baenzngoenz guhhong naetnaiq it-yiengh.

Daengngoenz doek bya, hainduj laepmomj. Gyoengqvunz gwn caeuz sat, couh gaemdawz gaiqbeiz, gaemdawz cazboi, roxnaeuz gienj fan diemx ndeu, lumj bae haw nei comz bae coh ndoengfaex. Bouxlaux miz bouxlaux naemjngeix, lwnyez miz lwnyez dajsuenq. Dou haenggyaez doxdoengz, couh dwg siengj comz itheij dingq duzbid hemqswenj. “Nget-Nget”, sing de seuqset caemhcaiq raezred. Ngamq hainduj, baenz gyoengq baenz raq hemqswenj, daengzlaeng gyoengq bid wnq lumjnaeuz deng ganjyenj nei,


foenfoen gaenriengz hemqcaca, yaep-seiz, daengx benq ndoeng cungj dwg sing bid goenjhuu. Caiq gvaq sam daengz haj faen cung, gyoengq bid lumjnaeuz swenj baeg lo, singyaem daj giengz daengz yox. Danhseih gvaq yaep ndeu, sing bid youh sawqmw h goenj hwnjdaeu, lumjnaeuz miz vunz bae cijvei de ityiengh. Haujlai lwnyez manzgaengq, mbouj gag dingq bid swenj. Gyoengqde menhmenh benz hwnj gofaex bae, menhmenh depgaenh duzbid, cik fwngz ndeu got dawz ganjfaex maenhcat, lingh cik fwngz cix iet bae coh duzbid. Yaepyet, duzbid lumjnaeuz yaek miz yungyiemj daeuj daengz, doq mbin deuz lo. Seizde, gyoengq lwnyez gag gyangz gag doeknaiq, menhmenh nod roengz laj faex daeuj.

Mwhhaenx, cungj miz vunz byaij haw gvaq luengq heuh “sou byuk duzbid”. Dingq bouxlaux naeuz, byukbid ginggvaq gyagoeng ndei le, ndaej dawz daeuj yw buqsiengfung, rwz ok nong, ndigah miz vunz cienmonz daeuj soucawx. Baenzneix, dou lai miz di ngaenz ndeu cuengq youq ndaw daeh. Gyanghaet romhriq, gyoengqvunz daj ndaw fangzhwnz loq ndiusingj, dou dingq duzbid hemqswenj, dou caij gvaq raemxraiz, riu j aen lamz iq ndeu, gaemdawz diuzsaux samseiq mij raez, couh bae ndaw ndoeng gip byuk duzbid. Gvaq

mbouj geij ngoenz, dou couh dingqnyi miz vunz daeuj ra cawx byuk duzbid. Seizhaenx, dou doq buet okbae heuh de haeuj ranz daeuj, hag vunzlaux caeuj de gangj gyaqcienz. Doeklaeng, vuenh ndaej gij ngaenz haenx deng dou cawx gijgwn ma oet roengz dungx bae lo.

Ngoenz bae ndwen ma, faenh mizyinx dingq bid swenj, gaeb duzbid, gai byukbid gaenq bienq damh

haujlai. Ngoenzhaenx, gou youh dauq daengz mbanjranz, mbanjranz gaenq mbwn fan dei h byonj. Benq ndoeng raeblaeng ranzgaeuq, gaenq hwnj baenz dab baenz dab ranzlaeuz, gou ndwn youq giz dieggaeuq cungmuenx singriu haenx, youh dingq ndaej nyi geij sing bid hemqswenj. Youq ndaw sing bid hemqswenj, seiznyez youh dauqungz ndonj haeuj ndaw simdaeuz gou bae lo.



Loekraemx Mboqbanq Cingsib (Daegso ingi)

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□Hoz Saubangj sij Cinx Siengzcouh Liuz Gingliuj Cinx Siengzgen hoiz

Veiz Gozcingh gig gvansim swegih dangjan ancienz. Mwh ngamq guh cunjbei hoenxcienq, de caeuj Gyauz Yaujgvangh, Vuj Cinnanz, Ho Hihmingz, Cinx Yinggih, Anh Bingzswng, Ho Fan, Ouh Cifu daengj goengdaeuz doxyaeng, daezok youq diegbya baihsae Guengjsae hwnjguh ranzyo, senj dangjan youqgaenj daengz gizde bae yo. Daihgya cungj doengzeiq gij yigen de, gietdingh youz cunjbei hoenxcienq bangunghsiz roengzfwngz banh gienh saeh neix. Sij Cinghswng daiqlingx geij boux bangunghsiz dungzci genj ndei giz ndeu, veh ndei doz le lwnh hawj Veiz Gozcingh caeuj Cinx Yinggih nyi, naeuz gizde gyawj goengloh, henz roen miz goengq bya ndeu, daj rog goengloh yawj mbouj raen baihdaw, henzgyawj ngamq miz geij hoh beixnuengx Yauzczuz youq, gizde doekgungx youh ancienz, gyaudoeng hix fuengbienh. Veiz Gozcingh dingq le gig habhoz, Cinx Yinggih caemh doengzeiq. Veiz Gozcingh naeuz: “Dangjan dwg gihmiz caeuj caizfouq dijbaui guekgya raeuz, gienh saeh neix dingh le couh sikhaek bae guh”. Veiz Gozcingh youq “Vwnzgwz” cibfaen gannanz lajde, lij nda’nduengq geiqmaeuz cujcz cidaih dawz gij huq gyoengq lwgminz Yeznanz gaenj yungh haenx soengq

bae daengz Yeznanz.

Bi 1964, gunghginh moux bu souhmingh senj daengz Namzningz saedhengz yinvu. Guengjsae raeuz caezsim roengzrengz bae cihciz gunghginh cap youq Guengjsae haenx hwnjguh caeuj gunghawj houginz. Youq Ningzmingz, Denzyangz, Gveilinz daengj dieg gaenjgip hwnj le geij aen feihgihcangz hawj bing yungh, Veiz Gozcingh caenndang cazcam, ciji mizgven bumwnz gibseiz gaijgez dieg yungh feihgihcangz, cagaenj hwnjguh, hanhgeiz guh baenz. Doiq gyagvangq Vuzhih Feihgihcangz de caemh caenndang bae sonyinx. De naeuz gyoengq goengdaeuz cunjbei hoenxcienq bangunghsiz, gij gunghginh cap youq Guengjsae haenx rap dwk gij hongnaek henhoh guekcoj baihnanz haenx, seiqseiz cungj yaek bae dingjhoenx Meijgoz feihgih daeuj

ciemqfamh, gyoengqde siengj aeu gijmaz, raeuz caij hoj hix aeu bang gyoengqde gaijgez, bang gyoengqde baiz you geij nanh. Gij gunghginh cap youq Guengjsae haenx haekfug gak cungj gannanz, haenq lienh bonjlingx, buekmingh hoenxcienq, 10 baez youq gwnzmbwn Guengjsae dwk doek Meijgoz feihgih fouzvunz hai haenx. Doenghgij saeh neix, gig daih gujvuj le gyoengqvunz Guengjsae caeuj vunz ndaw guek. Veiz Gozcingh caenndang ciepraen gij vunz miz goenglauz dwk feihgih Meijgoz doek haenx, gujli gyoengqde caij haenqsim roengz-rengz, laemxsim mied raeg sojmiz gij feihgih vunzdig haeujciemq bae.

Veiz Gozcingh gig yawjnaek gij hong minzbingh. De youq Vujmingz Liengzdungz seiz, caenfwngz ca hong cingjdun cujcz minzbingh, nyinhcaen gvancez aen ciji Mauz cujsiz

gvendaengz “hong minzbingh aeu guh daengz cujcz lozsiz, cwngcwz lozsiz caeuj ginhsw lozsiz”. Ndaw hong cunjbei hoenxcienq, de daegbied iugouz gak gaep dangjvej caeuj yinzminz vujcanghbu cietsaed gya-giengz lingjdau hong minzbingh, guh ndei “sam aen lozsiz”, guh daengz “baez heuh couh daeuj, daeuj le hoenx ndaej ciengq”. De doiq boux dungzci ginhgih ca hong minzbingh haenx naeuz: “Minzbingh dwg aen bouhfaenh youqgaenj gyoebbaenz rengz vujcangh guek raeuz ndeu, de caeuj yinzminz gaijfangginh doxcaeuj rap hwnj diuz rapnaek henhoh guekcoj raeuz. Guh ndei hong minzbingh le, danghnaeuz Meijdigozcujyi gamj hoenx haeuj Guengjsae daeuj, itdingh dauqcawq deng hoenx, doek roengz ndaw haij gyoengq lwgminz hoenxcienq haenx bae.”

(caengz sat)